

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810

selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810

dzenita@sogfbih.ba

Sadržaj biltena:

Savez završio program obuke za općinske službenike za odnose s javnošću	1
Održana javna rasprava o primjeni zakona o zaštiti i dobrobiti životinja	1
Potvrđen ISO 9000:2008 standard za Općinu Vogošća	3
Potpisani ugovori o grantu na projektu WATSAN sa načelnicima osam općina	4
Općina Goražde pokreće tužbu protiv HE 'Piva'	4
U Čitluku počela realizacija projekta o upravljanju čvrstim otpadom	5
Turska Općina Meram uložila million KM u Hadžiće	5
Položen kamen temeljac za izgradnju rezidencijalnog naselja 'Sarajevo Resort'	5
Podrška Fonda za zaštitu okoliša FBiH projektima na području općine Bihać	7
Svjetska banka ulaže 9 mil.KM za uređenje obaloutvrde u Goraždu	7
Otvorena ambulanta porodične medicine u ilijaškom naselju Mrakovo	8
Italijani razmatraju otvaranje fabrike za preradu i otkup voća u Brezi	8
Završen drugi međunarodni sajam općina – NEXPO 2013	9
Poziv za obuku iz oblasti monitoring i evaluacije	10

Bilten Saveza općina i gradova Federacije Bosne i Hercegovine

SAVEZ ZAVRŠIO PROGRAM OBUKE ZA OPĆINSKE SLUŽBENIKE ZA ODNOS S JAVNOSTIMA



Sa radionice u Sarajevu

Savez općina i gradova Federacije Bosne i Hercegovine je, uz pomoć Projekta „Razvoj kapaciteta saveza općina i gradova u BiH“, kojeg finansira Švedska međunarodna razvojna agencija 'SIDA', u periodu od 17. septembra/rujna do 10. oktobra/listopada održao pet radionica za općinske uposlenike na poslovima odnosa sa javnošću.

Svrha održavanja radionica jeste da pomogne osobama koje se bave odnosima sa javnošću u jedinicama lokalne samouprave da steknu bolji uvid u oblast organiziranja i kvalitetnog

upravljanja ovom djelatnošću, a kako bi što uspješnije izvršavali svoje uloge.

Radionica je bila namijenjena kako onima koji tek počinju raditi u oblasti odnosa s javnošću ili razvijaju te aktivnosti u svojoj organizaciji, tako i onima koji imaju već određena teorijska i praktična znanja.

Radionica je najviše bila usmjerena na način ostvarivanja kontakata sa medijima i izgradnju dobrih odnosa, kako odgovarati na medijske upite, kako napisati saopštenje i u kojoj formi i kome ga poslati, kako osmisliti dobar PR program za općinu, kako uticati na formiranje lokalnog javnog mnijenja i usmjeravati ga u željenom pravcu, i sl.

Radionica je ukazala na važnost proaktivnog PR-a i oblike komunikacije u savremenom okruženju i općenito na važnost utjecaja PR-a na stvaranje reputacije administracije koja je nezaobilazan faktor u promociji brenda općine.

Tokom izvođenja radionica, uvidjelo se da je ova oblast izrazito neujednačeno uređena po općinama, te da joj nije ukazan značaj koji zaslužuje. U skladu s tim, učesnici su sugerisali Savezu više preporuka šta je potrebno uraditi kako bi se unaprijedio ovaj segment općinskog rada. Jedna od preporuka jeste neophodnost usaglašavanja jedinstvenog naziva za sve službenike koji se bave odnosima sa javnošću u općinama, kao i opisa poslova kojim se bave.

Na osnovu iskustva sa održanih radionica, Savez će, između ostalog, formirati i Mrežu službenika koji se bave ovom djelatnošću u jedinicama lokalne samouprave, kao primarnom ili dodatnom aktivnošću, a u svrhu njihovog jačeg povezivanja i stvaranja brenda općinskog PR-a.

ODRŽANA JAVNA RASPRAVA O PRIMJENI ZAKONA O ZAŠTITI I DOBROBITI ŽIVOTINJA

SARAJEVO, 3. oktobar/listopad - U organizaciji Ustavnopravne komisije Predstavničkog doma Parlamentarne skupštine BiH održana je javna rasprava o primjeni Zakona o zaštiti i dobrobiti životinja, koja bi trebala pomoći u pronalaženju rješenja gorućeg pitanja sa rastućom populacijom uličnih pasa u BiH.

Četiri godine nakon stupanja Zakona o zaštiti i dobrobiti životinja na snagu, Ustavnopravna komisija Predstavničkog doma Parlamentarne skupštine BiH suočena je sa neprovođenjem zakona, nezadovoljstvom građana i povećanom populacijom uličnih pasa, zbog čega je podnesen zahtjev za javnu raspravu, koja je danas i organizirana.

Parlamentarna skupština je u junu/lipnju primila Prijedlog o izmjenama i dopunama Zakona o zaštiti i dobrobiti životinja, koji je još uvijek u zakonodavnoj proceduri.

Jedan broj poslanika još u februaru/veljači je pokrenuo inicijativu i zatražio analizu primjene zakona, čije su rezultate dobili tek u septembru/rujnu. Analiza je potvrdila da je zakon dobar, ali se ne provodi. U međuvremenu je zastupnica u Predstavničkom domu Parlamenta BiH Nermina Zaimović-Uzunović predložila izmjene i dopune zakona. Rasprava je pokrenuta kako bi se dobile instrukcije javnosti šta da se čini.



Sa Javne rasprave

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.chc-bih-mne.org
www.srb-bih.org
www.chc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu



Državna veterinarska inspektorica za kontrolu dobrobiti životinja, Inga Dujmović, objasnila je kako se nalazimo u fazi u kojoj treba konačno sjesti i razgovarati o problemima u vezi sa ovim zakonom. Rasprava o zakonu je preispitivanje našeg odnosa prema životinjama. Iako se učinci i doprinosi zakona čine neznatnim, on je osnovan sistem rješenja za zaštitu životinja te treba razumno prihvatiti rješenja iako se u trenutku ne čine najboljim. Zakon jeste primjenjiv, ali informacije sa terena pokazuju da sistem ne postoji. Činjenica je da je Ured za veterinarstvo djelimično zakazao, budući da nije donio pravilnik o identifikaciji pasa i mačaka, koji je ključan za kažnjavanje neodgovornih vlasnika, koji su uzrok problema.

"Treba pitati ko producira neodgovorne vlasnike, a to smo svi mi. Oni koji ne prijavljuju neodgovorne vlasnike, kao i oni koji nisu napravili popis životinja", navela je Dujmović.

Donošenje pravilnika o identifikaciji bi pomoglo organizaciji azila, a potrebno je i da svaka općina raspolaže informacijama o populaciji pasa, što je važno i zbog prevencija bolesti. Nakon procjene populacije, potrebno je uraditi trijažu na terenu te sterilizacije, dodala je.

"Ubijanje ne sprečava napuštanje, a napuštanje je ono zbog čega smo ovdje i dovodi do povećanja populacije. Ne treba podleći sitnim iskušenjima, do velikog cilja stiže se sitnim koracima", rekla je Dujmović.

Profesorica Selma Filipović, šefica Katedre za hirurgiju Veterinarskog fakulteta u Sarajevu navodi da je, nakon četiri godine neprovođenja zakona, ova tema zaslužila da dođe do javne rasprave.

"Pozivi na ubijanje su sramni potezi političkih lobija kako bi, na osnovu nerada, kupili simpatije javnosti. Bez provedenih analiza obrušili su se na najslabiju kariku – životinje na ulici. Rasprava je prilika da se razbiju mitovi o zakonu i riješe pitanja problema odgovornosti i toga kome odgovara ovakvo stanje te da se vidi kako dalje naprijed", rekla je Filipović.

Zakon, navodi Filipović, krive za problem i smatraju ga nedorečenim i neprovođenim. Međutim, problem nije nastao 2009. godine, donošenjem zakona, već je rezultat višedecenijske loše prakse i eliminiranja posljedica, a ne problema, kao i loše veterinarske prakse. Nikada nije postojala želja da se pripremi teren za donošenje zakona, a četiri godine nakon njegovog stupanja na snagu, on je apsolutno provediv.

"Pas na ulici je uvijek posljedica, a ne uzrok problema, što je zakon prepoznao. Program kontrole populacije je jedan vid liječenja problema, kao i sterilizacija i kontrola sredine. Najvažnije je prepoznati vlasništvo kako bi se riješio problem. Tu su i sterilizacija, edukacija i kontrola otpada, što je naučna i empirijski dokazana metoda, koju su proveli deseci zemalja. Psi na ulici nisu lutilice, već napuštene životinje", rekla je Filipović.

Povećan broj pasa je posljedica neselektivnog provođenja zakona, a jedan od uzroka je i period od godinu dana nakon stupanja zakona na snagu, kada su trebale biti provedene masovne akcije sterilizacije, što nije učinjeno.

Tu je i problem ekonomske situacije i toga ko može sebi priuštiti psa. Uz lošu ekonomsku situaciju u zemlji, jedna porodica teško da može udomiti psa.

"Metoda ubijanja je danas nedopustiva u svijetu. Želja za brzim rješenjem je rezultat neinformisanosti. Također, primjera loše vođenih skloništa je mnogo, počevši od Prače, koja je više nalik koncentracionom logoru. Ukoliko nastavimo prebacivanje odgovornosti i neprovođenje zakona, neće doći do brzog rješenja, čak i uz izmjene", kaže Filipović.

Kao moguće rješenje problema, Filipović je navela hitnu registraciju pasa i mačaka, kažnjavanje neodgovornih vlasnika, sterilizaciju, jačanje saradnje sa građanima, poboljšanje situacije u vezi sa skloništim i brojem udomljavanja te trening veterinaru i inspektora. Sistem rješenja je sadržan u zakonu, a problem stvaran decenijama ne nestaje preko noći.

"Ubijanje nije humano ni civilizirano i imat ćemo osudu EU. Stremimo ka integraciji, a ponavlja se genocid", poručila je Filipović.

Sanda Ljubić iz UG Stop ugrizu smatra zaštitare životinja saradnicima u rješavanju problema, a građane najslabijom karikom u problemu. Prema njenom mišljenju, zakon nije dobar, jer bi tako svi ribari ili ljubitelji borbi bikova bili prekršitelji zakona, a nadležne institucije nisu u stanju da ga provode.

Kako Ljubić navodi, jedini pokretač provođenja zakona su sudovi, odnosno žrtve ugriza. Mnoge općine ne žele izgraditi azile bez izmjena i dopuna zakona.

Ljubić se zalaže za mikročipiranje i registraciju pasa, ali i za ograničen rok držanja u azilima. Također tvrdi i da je zakon potreban, ali po evropskim standardima, te da mu trebaju izmjene sada, prije većih posljedica.

Profesor ekologije na Veterinarskom fakultetu u Sarajevu, Abdulah Gagić, navodi da je ekologija oblast u okviru koje je zakon trebao biti revidiran, kao i da ga niko nikada nije konsultovao pri donošenju. Prema njegovom mišljenju zakon je donošen u saradnji sa civilnim društvima, a osnovna kritika je da mu je pristupljeno sa aspekta čovjeka, krivca i generatora problema. Navodi i da se sterilizacijom onemogućava jedno od osnovnih prava životinja, a to je reprodukcija, što nije zaštita životinja, te je zatražio uvođenje eutanazije kao rješenje problema. Kao zamjerke zakonu naveo je i izostavljanje činjenica o halal i košer klanju, kao i životinja koje nisu toliko izložene javnosti.

Vođa projekta britanske organizacije Dogs Trust u BiH, Anel Bećirović, naveo je kako Dogs Trust, pored znatnih resursa, donosi i znanje.

"Zakon sadrži napredne i efikasne odredbe o identifikaciji i kontroli populacije pasa, kakve su i u evropskim zemljama. Zbog toga smo i odlučili da dođemo u BiH. Psima nije mjesto na gradskim ulicama, a problem treba rješavati zakonom predviđenim rješenjima. Problem nije zakon, a eutanazija je njime propisana u čak pet slučajeva, čime se štiti sigurnost građana. Ako bi se takve životinje eutanizirale, one bolje udomile, a ostatak obradio i vratio u stanište, ubrzo bi došlo do rješavanja problema", rekao je Bećirović.

On je također ukazao da je neophodno hitno formirati jedinstvenu bazu podataka o registrovanim psima te da su problem ljudi koji generiraju problem, kao i oni koji ga ne sankcioniraju. Izmjene zakona ne bi dale rezultate, a ne odražavaju ni stručni pristup, budući da se bave posljedicama, a ne problemom. Također, izmjene su i neisplative, jer donose dodatne troškove eutanazije, koja je pet puta skuplja od sterilizacije.

"Predviđenim mjerama treba više vremena, ali su daleko efikasnije. Vijeće ministara je, 8. aprila/travnja, usvojilo odluku da je zakon apsolutno provodiv te apelujem da se što prije počne provoditi, jer svi imaju isti cilj", dodao je Bećirović.

Jedina pravna koja se u BiH bavi pravnom zaštitom u slučajevima zlostavljanja životinja, Dalida Kozlič, također je ukazala na važnost mikročipiranja, utvrđivanje vlasništva pasa kao i kažnjavanje. Ona smatra da je kažnjavanje veoma važno jer utječe na svijest građana o tome šta je loše, a šta ne, a ukazala je i na problem pranja novca vlasti, kao i na to kako navedeni troškovi dnevnog boravka psa u azilu nisu 153 KM, kako se navodi, već 50-ak KM, zavisno od veličine i zdravstvenog stanja psa.

"Najveći krivci za nesprovođenje zakona su veterinarska inspekcija, policija i tužilaštvo. Veterinarski inspektori su se direktno oglašili o zakon, a neki javno govore i kako je neprimjenjiv te ga, kao takav, ne treba ni sprovoditi", rekla je Kozlič.

Predsjednica UG Prijatelji Mostar, Aida Čizmić, također smatra da je zakon apsolutno provodiv te da problem jeste pas, ali ga stvara čovjek. Čizmić smatra da je centralna baza podataka i registracija pasa neophodna, kao i mikročipiranje, sterilizacija, edukacija te kažnjavanje neodgovornih vlasnika i službenih osoba.

Nermina Zaimović-Uzunović, zastupnica koja je i predložila izmjene i dopune zakona, navodi da je razočarana što je tok diskusije usmjeren na provođenje projekta koji je "kraljica dodijelila BiH" te da dosadašnji način rješavanja nije uspješan i svakodnevno je sve više pasa. Zakon nije riješio problem i sve općine ne mogu da ga sprovedu. Potrebno je rješenje koje odgovara građanima, a ne organizacijama. Prema njenom mišljenju održavanje zakona je materijalni interes ljudi koji se bore za njega.

Građanin Stevan Drašković smatra da zakon nije dobar jer su ljudi postali ugrožena vrsta, a pravnik Goran Jeftić tvrdi da nije primjenjiv, jer "nije normalan". Navodi kako je prije donošenja zakona u Zenici svake godine ubijano pet hiljada pasa, a da sterilizacija i ponovno puštanje na ulicu nisu normalni.

"Kako registrovati pse i mačke na selu, kad mene ni poštar ne može naći? Sistem ne funkcioniše. To može u uređenoj Evropi", rekao je Jeftić.

Načelnik Općine Travnik, Admir Hadžiemrić, naveo je kako je na njemu da provodi zakon i napravi kompromis između životinja i ljudi, te da već dvije godine radi na sterilizacijama.

"Ne stojim ni na jednoj strani, ali hajde da provedemo zakon ili ga učinimo provodivim", rekao je.

"Nermina Zaimović-Uzunović, zastupnica koja je i predložila izmjene i dopune zakona, navodi da ... dosadašnji način rješavanja nije uspješan i svakodnevno je sve više pasa. Zakon nije riješio problem i sve općine ne mogu da ga sprovedu. Potrebno je rješenje koje odgovara građanima, a ne organizacijama. Prema njenom mišljenju održavanje zakona je materijalni interes ljudi koji se bore za njega".

POTVRĐEN ISO 9001:2008 STANDARD ZA OPĆINU VOGOŠĆA



Ocjenama auditora, Općina Vogošća je uspješno provela usklađivanje poslova i zadataka sa međunarodnim standardom ISO 9001:2008. Potvrđeno je da sistem funkcioniše, održava se i evidentna su poboljšanja u pružanju usluga građanima. Provjeru sistema je izvršila certifikacijska kuća "Bureau Veritas".

Jedna od najbitnijih činjenica kada je u pitanju ovaj standard jeste da su građani uključeni u planiranje

budžeta, program prioriteta, komunalne infrastrukture i izrade značajnih strategija. Audit je završen konstatacijom da je jasna opredijeljenost uprave za sistem upravljanja kvalitetom kao i kvalitetno pružanje usluga građanima u kojem aktivno sudjeluje kako rukovodstvo i tako i svi zaposlenici u Jedinstvenom općinskom organu uprave.



POTPISANI UGOVORI O GRANTU U PROJEKTU WATSAN FBIH SA NAČELNICIMA OSAM OPĆINA



Sa potpisivanja ugovora o
grantu na WATSAN Projektu

SARAJEVO, 27. septembar/rujan – Načelnici Općina Tomislavgrad, Orašje, Široki Brijeg, Bosanki Petrovac, Bosanska Krupa, Velika Kladuša, Konjic i Čitluk potpisali su danas u Sarajevu 13 ugovora o grantu na projektu "Vodoopskrba i odvod otpadnih voda u FBiH" (WATSAN FBiH). "Za sada se projekat WATSAN FBiH (vodoopskrba i odvodnja otpadnih voda u FBiH) implementira u dvadeset općina FBiH, a kreditna i grant sredstva su obezbijeđena posredstvom Evropske komisije i Evropske investicione banke (EIB). Ukupno četrnaest općina je potpisalo ugovor o kreditu, a bitno je istaći da se također švedska organizacija SIDA uključuje u ovaj projekat", kazala je Sanja Terzić, voditeljica Jedinice za upravljanje projektom (PMU).

Prema njenim riječima, u nekim općinama radovi su u poodmakloj fazi.

"BiH je 2008. godine potpisala ugovor o kreditu sa EIB-om. Tek u septembru 2011. godine osnovana je jedinica PMU pri FMPVŠ (Project management unit-jedinica za upravljanje projektom), što je bio uvjet banke da bi se počelo sa projektom. Za dvije godine obezbijedili smo sve uvjete za ulazak općina u projekat", rekla je S.Terzić i podsjetila da su oči Evropske komisije okrenute prema prijektu WATSAN, s obzirom na to da su sredstva iz IPA 2009 morala biti implementirana do 12. mjeseca 2013. godine.

Jedinica PMU uspjela je produžiti taj rok do 12. mjeseca 2015. godine i sačuvati 121 milion eura (oko 242 miliona KM) IPA sredstava namijenjenih za građane BiH.

"Mi smo općina koja spada u nerazvijene općine i ovakve prilike, potpisivanje ovog ugovora predstavljaju izgradnju, progres i ispunjavanje elementarnih ljudskih potreba. Zbog toga iskazujem riječi zahvalnosti i ovo je put da mi stignemo razvijeni svijet", rekao je Zlatko Hujčić, načelnik Općine Bosanki Petrovac, koja je učešćem u ovome projektu obezbijedila 1.200.000 KM za projektovanje kanalizacione mreže i rješavanje problematike odvoda otpadnih voda.

Đuro Topić, načelnik općine Orašje je podsjetio da će ova općina posredstvom projekta WATSAN u iznosu od 13 miliona KM u naredne dvije godine izgraditi oko 16 kilometara vodovodne mreže, imati uređaje za pitku vodu na svom izvoru te oko 15 likometara kanalizacione mreže.

Sudjelovanjem u projektu WATSAN, Orašje između ostalog rješava i zdravstvene i ekološke probleme, s obzirom na to da je geografski položaj ravničarski i da je dosadašnje uređenje ovih sistema bilo neadekvatno.

Emir Bubalo, načelnik općine Konjic istakao je kako će Konjičani rijeku Neretvu ovim projektom prema moru "otpremati" kao ekološki čistu i sačuvanu rijeku što će ostati kao "biser Hercegovine".

OPĆINA GORAŽDE POKREĆE TUŽBU PROTIV HE "PIVA"

GORAŽDE, 4. oktobar/listopad – Nakon što su propali svi pokušaji o vansudskoj nagodbi Općine Goražde i rukovodstva HE "Piva", Općinsko vijeće Općine Goražde na desetoj redovnoj sjednici donijelo je Odluku o odobrenju za podnošenje tužbe za naknadu štete protiv te hidroelektrane za naknadu štete nastale usljed poplavnog vala u periodu od 1. do 4. decembra 2010. godine na području općine Goražde. Riječ je o višemilionskim štetama, a prema urađenoj studiji procjena, direktna šteta je oko 7 mil KM i indirektna oko 8 mil KM, navodi se na općinskom sajtu.

„Na naše upite da se organizuje jedan zajednički sastanak, da li u sjedištu HE "Piva" ili u Vladi Crne Gore, nažalost nismo naišli na razumjevanje, svi odgovori su bili prebacivanje odgovornosti na drugoga, to jest da je jedna firma iz Italije ta koja je dobila koncesije kada je u pitanju HE "Piva", da još uvijek Srbija ima određene nadležnosti i mi smo vidjeli da se vješto izbjegava taj sastanak koji je trebao da se desi. Mi smo imali veliku štetu na vodovodnoj mreži, kanalizacionom sistemu, obaloutvrdama kao i putnim komunikacijama. Iz studije koja je urađena na bazi stručnih ljudi koji su radili i to je najjača podloga koju imamo. Studiju smo skupo platili, ali ona se pokazuje vrlo opravdanom i mi ćemo na bazi te Studije tačno dokazati šta je to općinsko i šta mi možemo da tražimo kao naknadu", istakao je načelnik Općine Goražde Muhamed Ramović.

Ramović je još jednom podvukao da se tužba odnosi isključivo na štete pričinjene nad dobrima u vlasništvu Općine Goražde i ukoliko se tužba riješi u korist Općine, sredstva će biti utrošena za sanaciju šteta, prije svega onih pričinjenih na obaloutvrdama rijeke Drine, te kanalizacionoj i vodovodnoj mreži. Također je naglasio da tužbu mogu pojedinačno podnijeti i građani čija su dobra pretrpjela štetu kao i privredni subjekti. Prema trenutnim podacima, tužbu protiv HE "Piva" do sada su pokrenule tri firme sa ovog područja.

S obzirom na to da je riječ o višemilionskim štetama, osim općinskog pravobranioca, Ramović ističe da su spremni angažovati cijeli advokatski tim.



Brana HE 'Piva'

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfoceantar.ba
www.balkanfund.org
www.eurelmed.com
www.eacea.ec.europa.eu



U ČITLUKU POČELA REALIZACIJA PROJEKTA O UPRAVLJANJU ČVRSTIM OTPADOM

Dopremanjem 165 kontejnera za prikupljanje otpada u krug pročištača u Potpolju u subotu, 5. oktobra/listopada je započela realizacija sporazuma kojega su u decembru/prosincu prošle godine potpisali načelnik općine Čitluk Ivo Jerkić i predstavnik Švedske međunarodne agencije za obnovu i razvoj (SIDA) Pelle Persson.

Sporazumom o podršci za unaprjeđenje upravljanja čvrstim otpadom SIDA se obvezala Općini Čitluk, uz već dopremljenih 165 malih kontejnera zatvorenog tipa, donirati i 70 kontejnera zapremine 1,1 kubni metar u boji za odvojeno prikupljanje PET ambalaže, papirnog i metalnog otpada, 20 velikih otvorenih kontejnera zapremine 5 kubnih metara i specijalizirano vozilo za prikupljanje otpada nosivosti 9 tona. Vrijednost navedene opreme je 249.950 €, a oprema bi u Čitluk trebala biti dopremljena do kraja studenog/novembra.



Donirana sredstva su nepovratna, no kako bi projekt bio realiziran Općina Čitluk se potpisanim sporazumom obvezala urediti mjesta (tzv. zelene otok) na kojima će biti postavljeni spomenuti kontejneri, sve u svrhu dugoročnog zbrinjavanja komunalnog otpada.

Na području općine Čitluk planirano je uređenje 35 zelenih otoka koji bi bili ravnomjerno raspoređeni po svim mjesnim zajednicama općine Čitluk.

TURSKA OPĆINA MERAM ULOŽILA MILION KM U HADŽIĆE

Turska općina Meram do sada je uložila na području sarajevske općine Hadžići oko milion KM, a odlična saradnja bit će nastavljena. U planu je izgradnja privrednog centra da bismo pružili informacije turskim privrednicima, prije svega iz regije Konye koji bi htjeli da razvijaju svoj biznis u BiH - istakao je u razgovoru za Fenu načelnik Općine Hadžići, Hamdo Ejubović.

Protokol o saradnji ovih dviju pobratimskih općina potpisan je 2005. godine.

Turska općina Meram, između ostalog, na teritoriji općine Hadžići, u Binježevu, izgradila je savremenu ambulantu porodične medicine čija izgradnja je koštala oko 500.000 KM. Također je izgrađen centralni park u Hadžićima, Park Meram - Konya, u vrijednosti od oko 300.000 KM, kao i 30-metarski jarbol s najvećom bh. zastavom u BiH dimenzija 12x6 metara.

"Općina Meram u saradnji s Općinom Hadžići finansirala je i školu rukotvorina, kroz koju je prošlo 1.000 polaznika, kao i kurs turskog jezika", kaže načelnik Ejubović.

Odnosi između općina Hadžići i Meram se razvijaju u sferi političke saradnje, kulturne, privredne. Ejubović kaže da je ta saradnja realizirana nizom projekata na području Hadžića, među kojima je i Kulturno-edukativni centar Hadžići-Meram u kojima se polaznici obučavaju u izradi nakita, slikanju na foliji, drvetu i drugim projektima.

"Za stanovnike Hadžića posebno je važna izgradnja ambulante u Binježevu koju je u potpunosti finansirala Općina Meram u iznosu od više od 500.000 KM zajedno s opremom. Tu će biti i stomatološka ambulanta, te mjesna zajednica. To je prelijep objekt koji je poklonjen Mjesnoj zajednici Binježevo", kazao je načelnik Ejubović.

Zahvaljujući tome, oko 5.000 građana, koji pripadaju lokalitetu Binježeva i Miševića, zdravstvene potrebe moći će ostvariti u okviru službe porodične medicine i stomatologije.

"Imamo u planu da napravimo privredni centar, u kojem bismo pružili informacije turskim privrednicima, prije svega iz regije Konye koji bi htjeli da razvijaju svoj biznis u BiH", kazao je načelnik Ejubović.

Preuzeto sa: ekapija.ba



Park Meram - Konya u Hadžićima

POLOŽEN KAMEN TEMELJAC ZA IZGRADNJU REZIDENCIJALNOG NASELJA "SARAJEVO RESORT"

HADŽIĆI, 2. oktobar/listopad – Na Oseniku u Hadžićima danas je položen kamen temeljac za izgradnju rezidencijalnog naselja "Sarajevo Resort", ukupne vrijednosti 35 miliona američkih dolara.

Temeljac su položili ambasadori Kraljevine Saudijske Arabije Eid Al Thaqafi, Kuvajta Nasser Reden Al Motairi, Libije Arabi Al Hanudi, direktor Gulf Real Estate d.o.o Jasem Ahmed, te općinski načelnik Hamdo Ejubović. Ceremoniji otvaranja početka radova na ovom kompleksu prisustvovali su još i predstavnici ambasada Palestine i Egipta, bivši ministar pravde Kuvajta Džemal Šeab, te ambasador BiH u Kuvajtu Jasin Ravasde.





Grb Općine Breza

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipabc.org
www.interregadriatico.it
www.europa.ba
www.chib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

"BiH ima izuzetne prirodne i turističke potencijale, ali joj nedostaju kompleksi gdje bi se rekreacija na adekvatan način mogla upražnjavati. Zbog toga smo odlučili da u ovom kompleksu investiramo više od milion i po kuvajtskih dinara upravo na one prateće objekte koji se odnose na rekreaciju"

"Prije četiri godine kada smo došli u BiH ostali smo zapanjeni ljepotom, njenom prirodom i činjenicom da je mir ovdje uveliko zaživio. Kada dođete u BiH prvo što gledate jesu prilike za investicije. Te investicije, upravo kao što mi ovdje danas radimo, odnose se na nekretnine, turizam, posebno banjski turizam. Ovo je zemlja u koju kada dođete prvo upućuje na te četiri stvari. Naravno, investitori



kada dođu u neku stranu zemlju suoče se i sa problemima. Sugerisemo da ova zemlja uskladi svoju zakonsku legislativu sa potrebama investitora koji dolaze i ulažu svoj novac", kazao je direktor Gulf Real Estate d.o.o. Jasem Ahmed.

Prema njegovim riječima, ukupna površina "Sarajevo Resorts" prostire se na oko 160.000 metara kvadratnih zemljišta.

"BiH ima izuzetne prirodne i turističke potencijale, ali joj nedostaju kompleksi gdje bi se rekreacija na adekvatan način mogla upražnjavati. Zbog toga smo odlučili da u ovom kompleksu investiramo više od milion i po kuvajtskih dinara upravo na one prateće objekte koji se odnose na rekreaciju", rekao je on.

Kako je naveo, kompleks će biti zatvoren i imati svoje osiguranje.

"Imaćemo vještačko jezero na oko 12.000 metara kvadratnih. Imaćemo dva natkrivena bazena koja će biti grijana tokom zime, restorane, bar caffe, više terena za sportove poput fudbala, tenisa, odbojke, košarke. Napravićemo i sale za bilijar, stoni tenis, stoni fudbal...", rekao je Ahmed. Također, kompleks će imati svoj supermarket, te druge objekte koji će pomoći turistima da se što ugodnije osjećaju.

"Ovdje će se nalaziti oko 150 kuća različitih tipova. Neke će dosezati i do 500 metara kvadratnih. U različitim zgradama ćemo imati oko 160 stanova. U suštini, ovo će biti turističko selo namijenjeno za turiste iz Zaljeva i druge. Ovo je na neki način doprinos kuvajtskih i zaljevskih investitora razvoju privrede i turizma u BiH. Konkretan doprinos je taj da će godišnje iz Kuvajta i iz zemalja Zaljeva ovdje boraviti od 3.000 do 4.000 turista. Naravno, prilikom izvođenja jednog ovako velikog građevinskog poduhvata, biće angažovani projektanti i radnici iz BiH. Upravo kao i sav materijal koji se ovdje proizvodi. Rok za završetak radova je 18 mjeseci", dodao je Ahmed.

Prisutnima se obratio i ambasador Kuvajta u BiH Nasser Reden Al Motairi, koji je najavio novu vrstu diplomatije ove zemlje prema BiH, a to je privredna diplomatija.


"Treba napomenuti da Kuvajt i BiH imaju odličnu saradnju. Prva zemlja koja je investirala u BiH, odmah nakon rata, bila je Kuvajt. U ovom momentu želimo u ovdje promovirati ekonomsku diplomatiju. Trudimo se da olakšamo put investitorima i privatnom sektoru koji su jako zainteresovani za ulaganje u BiH. Projekat koji danas počinjemo upravo je dio te diplomatije. BiH je izuzetno privlačna za Kuvajćane. Broj posjeta je u 2013. porastao na 20.000 turista i očekujemo daleko veći broj u narednim godinama. Turističke rezervacije u Kuvajtu za BiH su odavno popunjene", kazao je ambasador Motairi.

Ukupna vrijednost "Sarajevo Resorts" trebala bi dostići 35 miliona dolara.

Usluge ovog kompleksa namijenjene su za sve turiste i građane BiH.

"Ovakav projekat bitan je za našu općinu, za Kanton Sarajevo i nadam se za državu BiH. Ovim se otvara proces arapskih investicija u našu državu i to upravo u onu oblast koju mi ovdje želimo da razvijamo, a to je turizam. Počeli smo sa ovim višemilionskim projektom. Kako su se Kuvajćani otvorili i počeli dolaziti u BiH, tako su i njihovi privrednici prepoznali šansu za biznis gradeći upravo ovakva rezidencijalna naselja", rekao je načelnik Ejubović.

Prema njegovim riječima, Općina Hadžići ima veliki turistički potencijal. "Tu je Igman i Bjelašnica, te lokacija koja je tranzit na putu Sarajevo-Mostar ili put od centra ka moru. Kuvajćani su sve to ispitali i izabrali ovu lokaciju na Oseniku, koja je ujedno i najljepša koju su mogli dobiti. Ima ih još i nadam se da će biti još investitora. Sa naše strane smo učinili sve da na brz način dođu do potrebnih dozvola za građenje i izvedbene dokumentacije. Ovo što oni danas ovdje grade, rade sa validnom građevinskom dozvolom prve faze za 32 objekata, a nakon toga slijedi i daljnja faza izgradnje. Što se tiče vrijednosti po mom inženjerskom iskustvu, sa svim sadržajima i namještajem ovaj projekat će narasti na respektabilnih 75 miliona dolara", dodao je Ejubović.



PODRŠKA FONDA ZA ZAŠTITU OKOLIŠA FBiH PROJEKTIMA NA PODRUČJU OPĆINE BIHAĆ



Sastanak načelnika Općine Bihać s predstavnicima Fonda
za zaštitu okoliša FBiH

BIHAĆ, 3. oktobar/listopad – Saradnja Općine Bihać i Fonda za zaštitu okoliša FBiH u proteklih nekoliko godina na zavidnom je nivou, a posebno se ogleda u realizaciji odobrenih sredstava Fonda za projekat odvodnje i pročišćavanja otpadnih voda u Bihaću, u iznosu od 2,1 milion KM. Ovo je danas istaknuto na sastanku mr.sci. Emdžada Galijaševića, Općinskog načelnika Bihaća sa delegacijom Upravnog odbora Fonda za zaštitu okoliša predvođenom predsjednikom Perom Golužom i članom UO Nerminom Delalićem, saopštavaju iz Općine Bihać. Poseban akcenat stavljen je na

spremnost Upravnog odbora Fonda za zaštitu okoliša FBiH da iz interventnih sredstava pomognu obnovu požarom uništenog krova kantonalne bolnice u Bihaću. S tim u vezi, Općina Bihać će do sjednice UO Fonda koja je zakazana za naredni ponedjeljak, uputiti zahtjev za odobrenje sredstava, čime bi se osigurala značajna donacija za kantonalnu bolnicu.

"Odlična saradnja koju Općina Bihać ima sa Fondom za zaštitu okoliša FBiH evo potvrđuje se i kroz spremnost članova Upravnog odbora da pomognu našoj kantonalnoj bolnici i to je potvrda da Općina Bihać i njeni građani imaju prijatelje i podršku brojnih institucija kako za obnovu kantonalne bolnice, tako i za projekt odvodnje i pročišćavanja oborinskih voda. Na našem posebnom računu mi smo do sada prikupili skoro 200.000 KM zahvaljujući brojnim institucijama, privrednim subjektima i pojedincima i svima u ime građana Bihaća zahvaljujem na solidarnosti i podršci", kazao je načelnik Galijašević.

Kako je istakao Pero Goluža, predsjednik UO Fonda za zaštitu okoliša FBiH, pored podrške projektu odvodnje i pročišćavanja oborinskih voda u Bihaću, Fond je odvojio 70.000 KM za razvoj Nacionalnog parka Una, te podržao održavanje sajma EKOBIS.

"Kada je u pitanju Unsko-sanski kanton za projekte u ovdašnjim općinama izdvojeno je 4,5 miliona KM što su značajna sredstva koja su iskorištena za projekte zaštite okoliša", dodao je Goluža.



Grb Općine Bihać

SVJETSKA BANKA ULAŽE 9 MILIONA KM ZA UREĐENJE OBALOUTVRDE

GORAŽDE, 3. oktobar/listopad – Općina Goražde već duže vrijeme susreće se sa problemom urušavanja obaloutvrda. Posebno se to stanje usložnilo nakon poplava iz decembra 2010. godine koje su zadesile ovu Općinu. Problem će biti riješen zahvaljujući Projektu kojeg je Općina Goražde aplicirala prema Svjetskoj banci za što su odobrena sredstva u iznosu od devet miliona KM, a riječ je o Projektu izgradnje i sanacije obaloutvrda rijeke Drine od Vitkovića do entitetske granice, tačnije Općine Novo Goražde, kao i Podhranjenskog potoka.



"Implementacija Projekta će biti naredne godine iz razloga što se radi potpuna projektna dokumentacija, jer smo imali idejni projekat koji je prihvaćen, a na osnovu toga dobijaju se sredstva. Sada radimo na glavnom projektu koji će se završiti do kraja godine, a to je uređenje obale od Vitkovića do entitetske granice, zatim uređenje Podhranjenskog potoka. Radiće se po projektu da se obaloutvrda vrati u stanje u kojem je bila, a biće obuhvaćen i novi dio obaloutvrde čime će se dobiti mnogo ljepši izgled grada, a šetališta će biti sigurnija za naše građane. Svjetska banka će raspisivati tender i to je vrlo važno da ne ide preko našeg budžeta kako bi izbjegli sve moguće sumnje u implementaciji tih sredstava, ali ćemo za sve potrebne aktivnosti biti na raspolaganju Svjetskoj banci. U narednom periodu mnogo više ćemo raditi na uređenju grada." – kazao je načelnik Općine Goražde, mr. Muhamed Ramović, navodi se na Općinskoj web stranici.





Grb Općine Ilijaš

OTVORENA AMBULANTA PORODIČNE MEDICINE U ILIJAŠKOM NASELJU MRAKOVO

ILIJAŠ, 10. oktobar/listopad – U MZ 'Mrakovo' danas je svečano otvorena Ambulanta porodične medicine i ured MZ 'Mrakovo', javljaju iz Općine Ilijaš.

Ovo je posljednja iz mreže od četiri ambulante porodične medicine, planirane za područje općine Ilijaš, utvrđene Odlukom o usvajanju mreže ambulanti porodične/obiteljske medicine u JU Dom zdravlja Kantona Sarajevo, koju je usvojila Skupština Kantona Sarajevo 27. januara/siječnja 2005. godine.

Izgradnja ovog objekta počela je 2011. godine, a izvođenje radova odvijalo se u fazama u skladu sa obezbijeđenjem finansijskih sredstava.

Realizaciju projekta izgradnje Ambulante porodične medicine u vrijednosti 350.000,00 KM finansiralo je Ministarstvo zdravstva KS i Općina Ilijaš, dok je opremu za Ambulantu obezbijedilo Federalno ministarstvo zdravstva.

Objekat je veličine 151 m², sa dvije ordinacije, jednom intervencijom.

Oko 3.000 stanovnika sa ovog područja će imati mogućnost da se oprijedjele za liječenje u ovoj ambulanti, tako da neće morati svakodnevno putovati do Ilijaša, te će time doći i do rasterećenja Doma zdravlja Ilijaš.



KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.chc.bih-mne.org
www.srb-bih.org
www.chc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

ITALIJANI RAZMATRAJU OTVARANJE FABRIKE ZA PRERADU I OTKUP VOĆA U BREZI



Predsjednica italijanske nevladine organizacije Re.Te. Maria Cinzia Massineo, projekt menadžer Luca Giliberti i pravna predstavnik ureda ove organizacije Lejla Tuzlak, sastali su se s brezanskim načelnikom Halilom Tuzlićem.

Sastanak održan u općini bio je prilika da se rezimiraju rezultati multisektoralnog projekta "Breza kooperacija i razvoj: podrška lokalnim inicijativama", koji su, u oblastima edukacije, mikrokreditiranja, poljoprivrede, obrade pitke vode i čvrstog gradskog otpada, spolne ravnopravnosti i mladih, implementirale nevladine organizacije Re.Te. i CESVI, a finansijski podržalo


Ministarstvo vanjskih poslova Italije.

"Projekt podrške lokalnim inicijativama u svrhu rekonstrukcije i razvoja potvrda je zalaganja Italije po pitanju kooperacije i podrške bosanskohercegovačkom civilnom društvu", kazao je Tuzlić, uputivši iskrene zahvale Gradu Torinu, svim nevladinim organizacijama i pojedincima iz Italije za sve što su učinili po pitanju poboljšanja kvalitete življenja u Brezi.

Navodeći podatak da Breza spada u red općina sa najviše zasijanog voća u ZDK, Tuzlić je naglasio da bi lokalnom stanovništvu dobro došla finansijska podrška Italije u cilju otvaranja fabrike za otkup i preradu voća, jer su se, kako je naveo, stvorili uvjeti za proizvodnju.

"Otvaranje objekta takvog tipa dalo bi novi impuls privredi Breze. Uposliti ljude i otkupiti ono što su proizveli jedan je od načina da se suprotstavi negativnim trendovima u ekonomskom smislu i suzbije siromaštvo", istakao je Tuzlić. Predstavnik italijanske organizacije obećali su da će uspostaviti kontakt sa privrednicima iz svoje zemlje, koji bi eventualno bili spremni investirati u projekte ovakvog tipa u lokalnoj zajednici.

Sastanku je prisustvovao i Alen Smajić, saradnik na poslovima pripreme projektnih prijedloga prema inostranim i domaćim institucijama, koji je svojevremeno bio angažiran kao lokalni asistent u uredu italijanske nevladine organizacije Re.Te.



Grb Općine Breza



ZAVRŠEN DRUGI MEĐUNARODNI SAJAM OPĆINA – NEXPO 2013



Od srijede 25. septembra/rujna do petka 27. septembra/rujna 2013. godine, u Rijeci i Opatiji, održao se drugi po redu NALAS (Network of Associations of Local Authorities of South East Europe) International Municipal Fair, NEXPO 2013.

Inače, Prvi međunarodni sajam općina i gradova 'NEXPO' održan je u martu/ožujku 2011. godine u Sarajevu u organizaciji Nalas-a i Saveza

općina i gradova FBiH.

Kao domaćini Drugog sajma, gradovi Rijeka i Opatija, otvorili su svoja vrata za oko dvije hiljade učesnika, tristotinjak predstavnika lokalnih samouprava te poslovnih i razvojnih agencija jugoistočne Evrope (SEE).

Prvog dana NEXPO sajma održana je konferencija pod nazivom "Put integracije u EU – uklonimo prepreke, otkrijmo svoj potencijal"/"The Road to EU Integration – Removing Barriers, Unlocking our Potential", koja je imala naglasak na ključnu ulogu lokalne samouprave u procesu EU integracije. Više od 450 gradonačelnika, zamjenika gradonačelnika, predsjednika gradskih vijeća i direktori lokalnih vladinih udruga sudjelovao u radu konferencije, potvrdivši da lokalne vlasti mogu dati značajan doprinos u procesu integracije u EU. Konferencija je pokazala da samo napredak ka cilju poboljšane integracije sa i unutar EU-a, zajedno s regionalnom saradnjom, može omogućiti razvoj i pronalaženje rješenja ekonomskih i socijalnih problema s kojom se regija jugoistočne Evrope suočava.

G. Gerhard Schumann-Hitzler, direktor IPA strategije pri Evropskoj komisiji, naglasio je: "Sve države koje imaju namjeru pristupiti Evropskoj uniji moraju razviti strategije za pametan, održiv i uključiv rast, u skladu sa strategijom EU2020. Lokalne vlasti igraju iznimno važnu ulogu u tom procesu i NALAS je s pravom odabran kao jedan od koordinatora u razvoju strategije SEE2020. Dopustite da vam se sada već zahvalim na vašem angažmanu".

Predstavnik Odbora regija, g. Luc Van den Brande rekao je: "Ne sviđa mi se izraz proširenje, želim govoriti o ponovnom ujedinjenju. Uloga lokalnih vlasti ne bi se trebala ograničiti na provedbu odluka na lokalnom nivou ili širenje informacija o politikama EU-a. Mi, lokalne i regionalne vlasti, odgovorni smo partneri u tom procesu".

Rasprava iz perspektive regionalnih institucija otkrila je da je unutrašnjo-regionalna saradnja imperativ za uspješnu integraciju u EU. U tom svjetlu, Strategije South East Europe 2020 ključni je dokument koji će utrti put organiziranim naporima zemalja i lokalnih vlasti jugoistočne Evrope.

Izložbeni dio sajma NEXPO 2013. službeno je otvoren u četvrtak, 26. septembra/rujna 2013. godine u Centru Zamet u Rijeci. Sajam su pozdravnim i uvodnim govorom svečano otvorili gradonačelnik Rijeke Vojko Obersnel, gradonačelnik Opatije Ivo Dujmić, potpredsjednik NALAS-a i predsjednik Association of Municipalities u Republici Hrvatskoj Đuro Bukvić, te ministar Uprave Arsen Bauk, koji je Sajam proglasio otvorenim.



Zajednički štand općina Žepče, Tešanj i Teslić

Na Sajmu je bio predstavljen 81 izložbeni štand a svi učesnici potrudili su se atraktivno urediti svoj prostor kako bi privukli što veći broj posjetitelja, partnera i ostvarili obostrano korisnu saradnju. Na štandovima su predstavljali svoju organizaciju, pružali korisne informacije te uspostavljali nove kontakte i potencijalna partnerstva. Regionalni sajam, na kojem je predstavljeno 81 štand, 50 tvrtki, sudjelovalo 230 gradonačelnika iz 270 jedinica lokalnih samouprava iz 16 zemalja, 134 novinara, uspješno je zatvoren u petak 27. septembra/rujna 2013. godine.



Štand Općine Travnik



Štand Općine Gračanica

Savez općina i gradova Federacije
Bosne i Hercegovine

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u



POSJETITE NAS NA WEB-U

www.sogfbih.ba

POZIV NA OBUKU IZ OBLASTI MONITORINGA I EVALUACIJE

Udruženje evaluatora u Bosni i Hercegovini poziva zainteresovane da se prijave na međunarodnu Obuku iz oblasti monitoring-a i evaluacije. Obuka je skraćena verzija IPDET obuke koja se održava u Kanadi sa istim trenerima. Treneri su svjetski priznati eksperti iz ovih oblasti, Linda G.Morra Imas i Ray C. Rist. Obuka je certificirana i priznata širom svijeta.

Obuka će se održati od ponedjeljka 2. do subote 7. decembra/prosinca 2013. godine.

Obzirom da je navedena obuka prestižna i relativno skupa za naše uslove organizator je obezbijedio oko 30 stipendija ciljnim skupinama državnih službenika na svim nivoima vlasti, nevladinom sektoru i akademskoj zajednici. Molimo zainteresovane, koji nemaju obezbijeđeno finansiranje, da se prijave kroz prijavu na web stranici www.bheval.com, te da navedu na prijavi da se traži finansiranje obuke. Konačnu odluku o davanju stipendija će donijeti donatori. Također zainteresovani mogu iznaći vlastiti izvor finansiranja kroz druge vidove podrške. Ukoliko aplicirate za stipendije molimo vas da to uradite što prije.

Obuka će biti provedena na engleskom jeziku.

Cijena obuke je oko 2117 BAM ili 1080 EUR + PDV.

Poziv je otvoren do 15.11.2013. godine.

Broj učesnika je ograničen i iznosi 55.

Više detalja o samoj obuci možete pronaći u programu koji se nalazi na web stranici:

www.bheval.com

U slučaju da imate dodatnih pitanja nemojte oklijevati da nas kontaktirate putem mail adrese

contact@bheval.com

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

